



MANIFIESTO DI PUEBLO

Awe diaranson 26 di november 2014 den un Manifestacion masal di Pueblo teni dilanti di Parlamento di Aruba, **COMISION TA BASTA**, den number di e mas cu 10.410 firmantenan di e accion pa sostene nos Gobernador y tambe tur e miles di manifestantenan presente awe tardi, kendenan ta para pa “Deugdelijkheid van bestuur en deugdelijk financieel beleid” ta trece e siguiente puntonan na conocimiento di Parlamento di Aruba.

CONSIDERANDO:

1. Cu Democracia ta significa cu “Pueblo ta gobierna”, mediante Parlamento, cual ta e organo di mas halto di nos Constitucion y cu ta representa e totalidad di Pueblo Arubano (articulo III.1 di Staatsregeling di Aruba);
2. Cu e ministranan ta responsabilisa na Parlamento (articulo II.1 inciso 3 di Staatsregeling di Aruba);
3. Cu si un ministro no tin e confiansa di Parlamento, e ta pone su cargo na disposicion (articulo II.2 inciso 2 di Staatsregeling di Aruba);
4. Cu desde 2010 Gabinete Mike Eman – cu aprobacion di mayoria di Parlamento – a endeuda y hinca nos pais den un crisis financiero hamas visto den su historia;
5. Cu nos deficit financiero a casi triplica for di 163.1 miyon florin na 2009 te cu 443.9 miyon florin na 2014;
6. Cu rapport di CFT a conclui cu den apenas 5 aña, Gabinete Mike Eman – cu aprobacion di mayoria di Parlamento - di un manera irresponsable a redobla nos debenan di 40% te cu 80% di nos GDP, afectando drasticamente nos bienestar actual y nos futuro durante un periodo minimo di 24 aña;
7. Cu nos reserva di divisa a baha drasticamente for di 1475 miyon florin na 2009 te na 1039 miyon florin na 2014, poniendo asina valor di nos florin na peliger;
8. Cu instancianan internacional y local, manera IMF, Standard & Poor’s, Fitch, Algemene Rekenkamer, Raad van Advies, Banco Central y ultimamente CFT a describi detayadamente nos situacion financiero sumamente preocupante y desastroso;
9. Cu Gobierno di Reino mester a interвени dunando Gobernador di Aruba instruccion (‘aanwijzing’) pa no firma e presupuesto irealistico di 2014;
10. Cu Gabinete Mike Eman II pa prome biaha den historia a haya un Decreto Real (KB) debi na su mal maneho financiero;
11. Cu pueblo no por wordo sacrifica mas debi na tur e medidanan cruel cu Gabinete Mike Eman a pone y lo sigui pone riba lomba di pueblo;
12. Cu Gabinete Mike Eman II ta pone su prioridadnan completamente robes, no ta corta den su gastonan di luho y ta sigui derocha placa di nos pagadornan di belasting;
13. Cu pueblo no por sigui den e rumbo mas caminda nos pais lo sigui wordo perhudica financieramente, economicamente, socialmente y moralmente;
14. Cu den maneho di cualquier empresa responsabel, esnan cu hiba un maneho cu ta perhudica e empresa ta wordo retira inmediatamente.

TA CONCLUI LO SIGUIENTE:

- A. Exigi Parlamento di Aruba pa dentro di 24 ora yama un reunion publico di Parlamento y cual tin como unico punto di agenda, un mocion di desconfiansa contra Gabinete Mike Eman II;
- B. Cu manifestantenan ta keda para dilanti edificio di Parlamento te ora cu e reunion publico aki wordo convoca por escito;
- C. Cu ta exigi pa Parlamento bin mas pronto posibel cu iniciativa di e siguiente conceptionan di ley:
 - 1. Artículo V.10 – Un ley pa institui un Consejo pa controla ehecucion di leyman.
 - 2. Artículo V.13 - Un ley caminda reglanan ta wordo fiha pa garantisa e legitimidad di gobernacion y confiabilidad di control financiero.
 - 3. Artículo V.17 - Un ley cu ta stipula reglanan general di derecho administrativo.

Tur e tres leyman aki ta pa preveni cu den futuro nos politiconan sigui cu nan practicanan contra interes general di Aruba. E meta final ta cu nos tur por bay respira e aire di bon gobernacion den e pais aki.

Manifiesto entrega na Honorabel Presidente di Parlamento, Sra. Drs. Marisol Lopez-Tromp.



COMISION TA BASTA



Aruba, 26 di november 2014